

Ubutumwa Bikira Mariya yahaye Nyiramukiza Valentine, ku itariki ya 16/2/2021 saa cyenda na makumyabiri bwo kugeza ku basenga bose - (Rue Juliette Whytsman, 4 - 1050 Ixelles).

Bikira Mariya : Nyiramukiza, mwana wanjye nkunda, ntega amatwi ngutume.

Valentine : Karame Mama. Ndi hano ngo Untume aho ushaka no ku bo ushaka kuko ndi igikoreshe cyawe.

Bikira Mariya : Bana banjye ndabakunda.

Bana banjye ndabakunda.

Bana banjye ndabakunda.

Bana banjye nkunda iyo muteraniye hamwe musenga, muvuga ishapule n'ayandi masengesho asingiza Imana.

Bana banjye, nimusenge isengesho rivuye ku mutima, ririmo urukundo kandi rikubiye mu bikorwa. Ni mwisubireho, mwihane, mwicuze, mukundane nta buryarya, muvugishe ukuri kandi mugendere mu kuri, musabane imbabazi nta buryarya kandi mubabarire ntaburyarya mu bikuye ku mutima.

Mbabwiye ibi kuko tugeze mu bihe bikomeye aho hagiye kuzaba itotezwa ku mugaragaro ku basenga, bitwaje gusebya Uwo mbatumaho no kumuhora icyo ari cyo no kuba akiriho.

Bana banjye ibi mbabwira birakomeye. Ntawe urwanya ikitariho kuko avugisha ukuri ku byo yabonye, yabwiwe kandi tumutuma ku bantu b'isi yose ngo bahumuke baboneshe amaso y'umutima, babone aho umwanzi shitani yigabiza Kiliziya n'abihayimana b'ingeri zose.

Ibihishe byose bibi biri mu mitima yabo bizasohoka kubera amasengesho yanyu n'ay'abandi bose basenga mu mpande zose z'isi babasabira ngo bahinduke bakorere mu kuri nta buryarya. Nje kubabwira ngo muje muhora mwiteguye kuko mutazi umunsi n'igihe. Ibi mbabwira birambabaje cyane n'umwana wanjye arababaye cyane, kubera ibiri kuba muri za kiliziya no kubabaza abakristu.

Bana banjye murebe kiliziya zifunze ahantu hose.

Misa zirasomwa ? Zisomerwa he ? Abakristu bahabwa amasakaramentu ? Ay'abarwayi atangwa ryari ? Atangirwa he ? Na nde ? Gute ? Kandi batabegera !

Ubwo abihayimana bakora iki muri bino bihe turimo by'icyorezo cya corona? Kwirinda ni byo ! No kwizera Imana ugasenga na byo ni byo kandi ni wo muti uzatsinda ibyo byose. Ngicyo ikintu gikomeye batabona ko umwanzi yateye isi iyipfuka umunwa ngo hatagira ukuri gusohoka kukavugwa kugaherezamo imigambi ya shitani yateguwe n'abayikorera.

Maze ihera ku bategetsu ba Kiliziya n'amasengero ibateza ubwoba bubabuza kuvuga ukuri ku byo bemera bigisha, maze babapfuka umunwa bafunga kiliziya maze shitani iricara irabaseka cyane. Batangira gutotezanya hagati yabo abihayimana kuko hari abashirutse ubwoba bubahuka uwo mwanzi maze barasenga bifatanyaga n'abakristu. Abo baratotezwa cyane n'uko batabivugaga. Abo ni bo batuma hakiri agahenge muri Kiliziya. Bana banjye, ndabashimira ubwo bwitange n'ibitotezo byose muhura na byo. Muhumure ndi kumwe namwe sinzabatererana. Hari abitanze bafasha abarwayi kwihangana no kugenda basukuye roho zabo. Murababara ndabizi, bana

banjye, na mwe mwarakoze muzahembwa igihe nikigera kuko ndi kumwe na mwe muri byose, turagendana.

Amasengesho yanyu, mwe musenga, yagabanuye ubukana bwinshi bwa sekibi. Ni yo mpamvu irushaho gukaza umurego ariko izatsindwa kandi yaratsinzwe ntimukagire ubwoba. Namwe ndabashimiye mukomeze turi kumwe. Isengesho ryanyu rya saa cyenda murikomereho rihungababya ibitero bya shitani maze mwakongera guhura muri Rozali ya nijoro ikazunza umugongo isubira inyuma.

Mukomeze kuko ryeze imbuto nyinshi, bana banjye, ibyo mvuga ndabizi. Ntihazagire ubajya mu matwi ngo abateshe igihe. Muje mubasabira maze mwumve icyubaka, ikitubaka mugisige inyuma kuko ni ikibarangaza.

Ababasebya, ababatoteza, ababacira imanza, ababatuka mubime amatwi kuko si bo na bo, ni ikibatuyemo kibi.

Buri muntu wese naharanire kuba intungane yubahiriza amategeko y'Imana ni cyo Imana imushakaho.

Munsabe nzabaha, mwe murwaye nimwivuze, cyane cyane mwe murwaye imyuka mibi ya shitani, na mwe murwaye kuri roho.

Nkunda iyo munsanga mu gihe cyo gutambagiza indabo, buri muntu ahereza, atura umuryango we n'abe bese, asabira abarwayi b'ingeri zose, roho zo muri Purugatori abivanye ku mutima. Biranshimisha cyane kuko muba mukorerwamo n'ukuri kuri mu mitima yanyu, biba ari byo nyabyo kuko tuba turi kumwe namwe tunabyakira tukabaha umugisha, tukabakiza Njyewe n'Umwana wanjye Yezu Kristu kuko ntidutandukana na rimwe.

Murakagira abababyara, bana banjye. Namwe murakagira abo mubyara.

Ngiye kugenda mfite akazi, mwana wanjye.

Vuga aya Masengesho akurikira nguhe umugisha wa Kibyeyi, mwana wanjye. Uzasomerwa ubu butumwa cyangwa akabwisomera nawe azavuge aya masengesho azahabwa umugisha.

Valentine : Isengesho ryo gusabira abarwayi...,
Isengesho ryo gusabira abatwanga ...,
Dawe uri mu ijuru...,
Ndakuramutsa Mariya...,
Hubahwe Imana Data...

Bikira Mariya : Nguhayeho umugisha wanjye wa Kibyeyi : Kw'izina ry'Imana Data na Mwana na Roho Mutagatifu. Amina.
Wiriwe, mwana wanjye.

Valentine : Urakoze cyane Maman. Wirirwe.